

आकाशवाणी रायपुर (छत्तीसगढ़)  
(छत्तीसगढ़ी)

18.10 सोमवार

दिनांक 24.06.2024

\*\*\*\*\*  
\*\*\*\*\*

प्रमुख समाचार –

- अट्टारवां लोकसभा के पहली सत्र आज नवा चुने गे सांसद मनके सपथ लेके बाद सुरु होइस।
- प्रदेश के स्वास्थ्य कर्मचारी मन ह आज राज्य सरकार ले चर्चा के बाद अपन हड़ताल ल वापस लेबर सहमति दे दीन हे।
- मुख्यमंत्री ह किहीन हे कि राज्य के मितानिन मन ल उंखर मानदेय हर महीना ऑनलाइन मिल जही।

संसद–सत्र

अट्टारवां लोकसभा के पहली सत्र आज नवा चुने गे सांसद मनके सदन के सदस्य के रूप म सपथ लेके बाद सुरु होइस। लोकसभा के नेता प्रधानमंत्री नरेंद्र मोदी सपथ लेवइया पहिली सदस्य रिहीस। प्रोटेम स्पीकर भर्तृहरि महताब ह श्री मोदी ल सपथ देवाइन। एखर बाद लोकसभा अध्यक्ष के चुनाव तक सदन के कार्यवाही चलाय म श्री महताब के मदद बर चुनेगे अध्यक्ष ल पैनल के सपथ देवाय गीस। भाजपा सांसद राधा मोहन सिंग अउ फग्गन सिंह कुलस्ते ह चेयरपर्सन पैनल के सदस्य के रूप म सपथ लीन। फेर कांग्रेस सांसद के. सुरेश , डीएमके सांसद टी.आर. बालू अउ टी.एम.सी. के सुदीप बंघोपाध्याय ह पैनल के सदस्य के रूप म सपथ नइ लीन। एखर बाद केंद्रीय मंत्री अमित शाह, राजनाथ सिंह, शिवराज सिंह चौहान, नितिन

गडकरी, मनोहर लाल, पीयूष गोयल, जीतन राम मांझी, राजीव रंजन, डॉक्टर वीरेन्द्र कुमार, किरेन रिजिजू,

चिराग पासवान अउ दूसर सदस्य मन सपथ लीन।

एखर पहिली आज बिहनिया प्रोटेम स्पीकर भर्तृहरि महताब ल राष्ट्रपति भवन म राष्ट्रपति द्रौपदी मुर्मू ह सपथ देवाइन। सत्र के दौरान नवा लोकसभा अध्यक्ष के चुनाव छब्बीस जून के होही। एखर बाद राष्ट्रपति द्रौपदी मुर्मू ह सत्ताईस जून के संसद के दूनों सदन के संयुक्त बइठका म बोलही। राज्यसभा के सत्र सत्ताईस जून ले सुरु होही। संसद सत्र अवइया महिना के तीन तारिख तक चलही।

### प्रधानमंत्री-संसद सत्र

एखर पहिली, प्रधानमंत्री नरेन्द्र मोदी ह किहीन कि अट्टारहवां लोकसभा के सत्र विकसित भारत के निर्माण के संकल्प के संग सुरु होवत हे। श्री मोदी ह किहीन कि उंखर सरकार देस के सेवा बर सरलग प्रयास करही। सत्र ले पहिली संसद के बाहिर मीडिया ल जानकारी देवत श्री मोदी ह किहीन कि सरकार चलाय बर बहुमत के जरूरत पड़थे। फेर, देस ल चलाय बर आम लोगन के सहमति बहुते जरूरी हे। उंखर सरकार सबो ज्ञान ल साथ लेके अउ संविधान के पवित्रता ल राखत तेजी ले फइसला लेना चाहत हे।

### स्वास्थ्य कर्मी हड़ताल-वापस

प्रदेस के स्वास्थ्य कर्मचारी मन ह आज राज्य सरकार ले चर्चा के बाद अपन हड़ताल ल वापस लेबर सहमति दे दीन हे। खबर के मुताबिक स्वास्थ्य कर्मचारी संघ डहार ले तीन सूत्रीय मांग ल लेके हड़ताल के घोसना करे गे रिहीस। ए मांग म सामुदायिक स्वास्थ्य अधिकारी ल कार्य आधारित प्रोत्साहन रासि, आठ महिना के रूके वेतन अउ दूरस्थ ग्रामीण क्षेत्र म सुरक्षा देवाय जइसन मांग सामिल रिहीस।

मुख्यमंत्री विष्णुदेव साय के निरदेस म राष्ट्रीय स्वास्थ्य मिसन के संचालक ह संघ के प्रतिनिधि मंडल ले आज चर्चा करीन। शासन डहार ले बताय गीस कि सामुदायिक स्वास्थ्य अधिकारी मनके कार्य आधारित प्रोत्साहन रासि के भुगतान बर करीबन चौवालिस करोड़ रुपिया के रासि पहिलीच ले जिला मन ल जारी करे जा चुके हे। एखर अलावा दूसर मांग के संबंध म मुख्यालय स्तर म समिति बनाके समय-सीमा के अंदर परीक्षण कराय जाही।

### मितानिन-ऑनलाइन मानदेय

मुख्यमंत्री विष्णुदेव साय ह किहीन हे कि राज्य के मितानिन मन ल उंखर मानदेय हर महीना बैंक खाता ऑनलाइन म मिल जही। मुख्यमंत्री ह एखर बर स्वास्थ्य विभाग ल निरदेस घलो जारी कर देहे। उंखर निरदेस के बाद स्वास्थ्य मंत्री श्यामबिहारी जायसवाल ह एखर घोसना करत किहीन कि बहुते जल्दी मितानिन

मन ल बैंक खाता म भुगतान मिले बर लग जही। श्री जायसवाल ह किहीन कि एखर सुरुवात मुख्यमंत्री के हाथ ले होही।

### गेहूँ-भंडारण सीमा

खाद्य सुरक्षा प्रबंधन, जमाखोरी अउ सट्टाबाजी ल रोके बर केन्द्र ह राज्य अउ केन्द्रसासित प्रदेश के थोक अउ खुदरा व्यापारी मन उपर गेहूँ के भंडारण बर सीमा तय करे हे। नई दिल्ली म खाद्य अउ सार्वजनिक वितरण विभाग के सचिव संजीव चोपड़ा ह किहीन कि व्यापारी अउ थोक विक्रेता मन बर ए सीमा तीन हजार टन होही। खुदरा विक्रेता मनके हरेक प्रतिष्ठान बर ए सीमा दस टन अउ उंखर डिपो बर तीन हजार टन होही। श्री चोपड़ा ह यहू किहीन कि ए सीमा इकतीस मार्च दू हजार पच्चीस तक लागू रइही।

### बलौदाबाजार-बैठक

बलौदाबाजार कलेक्टर दीपक सोनी अउ पुलिस अधीक्षक विजय अग्रवाल ह आज संयुक्त रूप ले प्रेसवार्ता करीन। ओमन ह पाछु दिन बलौदाबाजार म होय आगजनी के घटना के बाद जारी कार्रवाई के जानकारी दीन अउ बतईन कि ओ घटना म करीबन बारह करोड़ रुपिया के नुकसान होय हे। एमा संयुक्त जिला कार्यालय भवन, जिला पंचायत कार्यालय, जिला निर्वाचन कार्यालय, तहसील अउ पंजीयन कार्यालय, वाहन, उपकरण अउ फर्नीचर ल नुकसान पहुंचाय गेहे। गाड़ी मन ल होय नुकसान बर बीमा कंपनी मन ले पइसा देवाय जात हे, जेमा ले अभी तक सात-आठ गाड़ी के मालिक मन ल पइसा मिल गे हवय अउ करीब तेईस ठिन मामला बांचे हे।

उहें, जिला कलेक्टर ह बतईन कि घटना ले पीड़ित लोगन बर शरीरिक मानसिक स्वास्थ्य ल बने करे बर राहत समिति बनाय गे हवय। दस्तावेज क्षति बर घलो टीम बनाय गे हवय। पुलिस, आबकारी, जिला योजना अउ सांख्यकीय विभाग म दस्तावेज पुर्ननिर्माण के काम घलो सुरु होगे हे। कानून व्यवस्था ठीक करे बर सरल बइठका करे जावत हे। अभी तक चेम्बर ऑफ कॉमर्स के संग दूसर संगठन अउ पेट्रोल पंप संचालक मनके संग बइठका करके सीसीटीवी कैमरा लगवाय बर केहे गेहे। ओमन बतईन कि जिला स्तर के सोशल मीडिया मॉनिटरिंग टीम घलो बनाय गेहे, जउन ह चौबीस घंटा निगरानी करत हे। भड़काऊ पोस्ट

उपर कार्रवाई करे जावत हे। एखरे संग शांति समिति के बइठका लेके शांति व्यवस्था बनाय बर निरदेस दे गे हवय।

उहें, पुलिस अधीक्षक विजय अग्रवाल ह बतईन कि ए घटना ल लेके अभी तक एक सौ अड़तीस लोगन ल हिरासत म ले गे हवय।

### आरएसएस व्याख्यान माला

राष्ट्रीय स्वयंसेवक संघ—आरएसएस के पांचवां सर संघचालक स्वर्गीस सुदर्शन जी के सुरता म काली रईपुर के दीनदयाल उपाध्याय ऑडिटोरियम म व्याख्यान माला के आयोजन करे गीस। एखर बिसय रिहीस—“भारतीय परिवारे व्यवस्था की शक्ति”। एमा मुख्य वक्ता के रूप म संघ के सब सरकार्यवाह रामदत्त चक्रधर सामिल होइन। ए कारीकरम म मुख्यमंत्री विष्णुदेव साय, विधानसभा अध्यक्ष डॉक्टर रमन सिंह अउ आरएसएस के मध्य क्षेत्र संघ चालक पुर्णेन्दु सक्सेना संघरा राष्ट्रीय स्वयंसेवक संघ—आरएसएस के पदाधिकारी अउ दूसर लोगन सामिल होइन।

### जवान—श्रद्धांजलि

सुकमा अउ बीजापुर जिला के सरहदी इलाका टेकलगुडेम म माओवादी मन डहार ले आईईडी ब्लास्ट के घटना म सहीद होय कोरबा बटालियन के जवान आर. विष्णु अउ शैलेन्द्र कुमार ल आज बस्तर म गार्ड ऑफ आनर दे गीस। एखर बाद जवान मनके पार्थिव सरीर ल उंखर गृह जिला तिरुवंद्रम अउ कानपुर बर रवाना कर दे गीस। ए मउका म चित्रकोट विधायक विनायक गोयल, पुलिस महानिदेसक अशोक जुनेजा, अतिरिक्त पुलिस महानिरीक्षक विवेकानंद सिन्हा संघरा दूसर अधिकारी मन मौजूद रिहीन।

खबर के मुताबिक काली तेइस जून के जगरगुंडा क्षेत्र के सिलगेर ले टेकलगुडेम जाय के रद्दा म जवान मन ल ले जावत टरक ल निसाना बनावत आईईडी बिस्फोट करे रिहीन। ए बिस्फोट म दू ज्ञन जवान के मउकाच म मौत होगिस।

### मौसम

अउ अब पेस हे मौसम के हाल...

प्रदेस म अवइया चौबीस घंटा के दौरान कुछेक जघा म हल्का ले मध्यम बरसा होय के अउ गरज—चमक के संग छींटा पड़े के संभावना हे। उहें, एक—दू जघा म गरज—चमक के संग अंधड़ चले के अउ आकाशीय बिजली गिरे के आसंका हे।

मौसम विभाग के अनुसार एक ठन द्रोणिका दक्षिण राजस्थान ले दक्षिण छत्तीसगढ़ तक बने हे। जेखरे संग उपरी हवा के एक ठन चक्रवाती घेरा दक्षिण छत्तीसगढ़ के उपर बने हे। एखर असर ले प्रदेस म छब्बीस जून ले जादा ले जादा जघा म हल्का बरसा होय के संभावना हे। संगेसंग मध्य अउ दक्षिण छत्तीसगढ़ के एक—दू जघा म भारी बरसा हो सकत हे।

\*\*\*\*\*  
\*\*\*\*\*